

Wānanga Whakapapa

Kaikōrero: Anthony Olsen, Rihi Vercoe, Tipene Marr, Kanapu Rangitauira, Rawiri Te Kowhai

Saturday 11 February, 2017

Kia timata ake i te ahiahi nei, e iti iho i te toru haora ki ahau a te ahiahi nei. Ko tāku e whāi ana hei te ahiahi nei, kia mārama ai koutou ki ngā mōhiohio kua tohaina ki a koutou. Ko tētahi atu o ā mātou mahi, he whakapukapuka i ngā kōrero mō Ngāti Rangitahi. Ko te hitori a Ngāti Rangitahi, e ai ki a Ngāti Rangitahi, tae noa ki to rātou whakapapa. Ka whai pānga aua kōrero ki ēnei kauhau. Nō reira, ki ahau nei, mā ngā kōrero e māmā ai te mau i te whakapapa.

Ko Ngāti Hinehua te mana whenua i Tarawera i mua i a Ngāti Rangitahi. Ka puta he raru i waenganui i a rāua, ka whakauruuru a Ngāti Hinehua ki roto a Ngāti Rangitahi hei hapū. Nō Ngāti Hinehua a Mikaere Heretaunga, nō Ngāti Rangitahi anō hoki. He kaha a ia ki te taki i te whakapapa a Ngāti Hinehua kia kore ai e ngaro. Kua whakaritea e Kerry he rārangi whakapapa, koia nei tētahi; ko ngā hekenga o tēnei whakapapa a Ngāti Hinehua, ko Nohotahi mā. Ko tētahi o ngā whānau i te āwhinatia e au, i heke mai i a Eriatara rāua ko Nohotahi. Kei te whai pānga anō hoki ki a Ngāti Hinekura. Kei Te Rotoiti a Ngāti Hinekura, kei Waititi. Ka puta to waka i Te Ara o Hinehopu, ko te moana o Te Rotoiti e hora ana, kei te taha māui o te rori he awaawa, whāia taua awaawa ki Hinekura Marae. Ko te pā kei muri i a Hinekura ko Ngā Uhu. Nā Rangiaohia rāua ko Tauahoehowaka te pā i hanga hei kāinga mō rātou i te hekenga iho i Rangihakakapua i te Kaituna.

I te matenga o Rangitahi, i wehea āna tamariki ki kāinga kē, i hari a Rangiaohia i tana whānau ki korā. Ahakoa i whānau katoa mai ngā tamariki a Rangitahi i tana pā i te Kaituna – nā, i konā a Mahi i akiaki i a Rangiaohia ki te tuku whenua hei kāinga mōna me āna tamariki, nā reira rātou i whai kāinga i Tarawera. Ka pērā anō tā Mahi tuku i ngā whenua, pērā i tō tana pāpā tuku i ngā whenua i Rotorua ki āna tamariki. Nō reira, tuku whenua ki ērā tamariki; a Rongomai, a Ihi a Pikiao, a Mokaikitiriki, Tūkaipia rātou ko Tūhakura i Tarawera. Kāore ahau mō te whakawhāiti i ēnei kōrero, ahakoa tōna miharo, kua mau kē aua kōrero ki roto i ngā kōrero a Ngāti Rangitahi (Ngāti Rangitahi Story). Ka kitea pea ōu pānga whakapapa i roto i aua kōrero, kia kaha tonu koutou ki te whai atu. E tika ana, i a mātou e whakapūaki ana i ō Ngāti Rangitahi kōrero, te kōrero mō a tātou pānga ki iwi kē. I te mea, he take nui aua pānga, ehara i te mea... kua rongo au i ētahi e mea ana nō ngā reanga tata nei aua hononga, kāore, engari te tika o aua whakapae. E ai ki aku kitenga rangahau, mai anō aua pānga whakapapa. He kaha ngā hononga ki a tātou whanaunga o Mataatua, he kaha anō ngā pānga ki a tātou whanaunga o Te

Arawa, ki tai i Mākino, ki tua hoki. He tino kaha ngā piringa ki a Waikato, ki te awa, i Mihi, atu i Mihi, i reira a Niheta, i Maunga Kakaramea me taua takiwā, tae rawa ake ki Te Rangitaiki, ki te wāhi i puta ai a Torehina rāua ko Waiata. He tuakana, teina rāua. Koia ko te pānga ki a Ngāti Manawa rāua ko Ngāti Whare. Kia kua ahau e mate ki te whakaaraara anō i aku maharatananga, e auau anō rānei i ngā kōrero, kia kaha tā koutou pānui i ngā wāhanga e toru kua oti kē i a mātou. He hītori aua wāhanga. Kotahi anō te wāhanga kāore anō kia mutu, anā ko ngā kōrero e hāngai ana ki a Ngāti Rangitihī ā, moroki noa nei. Me kī, i te 1968 pea i hanga i te rori matua mai te Pollen atu ki Umutahi, mahue a Manawahē Rd. He mea raupatu ngā whenua o Ngāti Rangitihī. Muru noa. Kāore i utua, i tango noa. Ka kōrerohia te karauna me aua take katoa, tā te karauna mahi tūkinō ki a tātou, ētahi o ngā pakanga o te wā, mā reira koe e whai māramatanga ai mō te nui o Ngāti Rangitihī. Ka kīi ētahi “kāore a Ngāti Rangitihī i pērā rawa te nui”. Engari tonu! Kāore pea nō Ngāti Rangitihī ake aua whenua, heoi i whai pānga a Ngāti Rangitihī me ngā iwi noho tata, ngā whanaunga hoki i te rohenga nui tonu.

Nā, e whā ngā tono i puta mai i te wāhanga o te ata nei, e whā i mahia ai e au. He nui anō ngā tono ki a Donna. E 5 rānei, e 6 rānei i te mahia e Kerry. Me whai tonu tātou i taua mahi mō ētahi haora anō? He kaupapa anō o koutou hei wānanga mā tātou?

Donna:

Anthony, kua utu kē pea ētahi o ngā pātai i ngā wānanga e rua o mua, tērā pea, tonoa he kape o ngā rauemi katoa i tohaina i ngā wānanga kua tū kētia, ka timata anō, mai i te timatanga. Kua whakairihia hoki aua wānanga ki YouTube, ka rapu i a Ngāti Rangitihī. Ki te rapu a- Kūkarā nei, a Ngāti Rangitihī Chapters, ka puta he pdf 1,2 me te 3 hoki pea. Kei roto i aua rauemi i tohaina kētia ngā whakautu ki ngā pātai kei te puta mai i tēnei rā. He tino āwhina te pukapuka nei, Ngā Kāwai Whakaheke o Ngāti Rangitihī.

Anthony:

Kua kitea e koutou te pukapuka i kōrerotia e Donna? Ki te rehitatia tō taenga a tinana mai, me mātua tāpiri atu i tō i-mera, he nama waea, he huarahi e taea ana e mātou te whakapā atu ki a koe hei tuku i ngā rauemi ki a koutou, māku hoki ētahi wāhi e whakakīki me te whakahoki atu ki a koe hei wānanga mōu. Kei te āhei aua mahi te mahi. Kotahi anake te mahi kē e āhei ana mātou ki te mahi, Donna, ki te hiahiatia, ka puta tātou ki waho ki te kōrero mō tētahi 20 mineti.

Donna: Kei te tūmanakohia mātou ki te kawē i te hunga e hiahiatia ana, ki tō tātou maunga, huri haere ki ngā whenua ō ā tātou nā tūpuna. Mā te wā aua wānanga.

Anthony:

Mō muri i te tina, ka puta tātou ki waho mō te hāwhe haora pea?

WAHO

Kei muri i te wakamoe, ko Pūtauaki, hoki pēnei mai, ki aua Paina e matemate ana i runga rā, he mea paihana rātou e ngā kaipupuri whenua, ko Mōkaingārara. Tē kitea mai i konei, ko te awaawa o Waitepuru kei te taha māui.

Ki te taupae tuatahi, e anga ana ki Mōkaingārara, he pā. Ko tōna ingoa ko Te Rangihouhiri. Nā Hikakino a Te Rangihouhiri, kāore kē i te kōrero mō Te Rangihouhiri tuatahi. Koina te kōrero i homai ki ahau. Kei muri atu i taua pā, ko Pāpoua Kei waenganui i a Mōkaingārara me Pāpoua, he ara kūiti. Nā te hanga o te whenua i taea ngāwaritia ai mā te tangata kotahi he wawao i te rohe i ngā whakaariki. Kotahi te ara pari, torotika tonu te heke atu mā te pohonga harapaki ki tua o Tāwauwau, kotahi te ara he wāhi tuarangaranga katoa o te waoku. Ka tū mai tētahi i Pāpoua, ka patua ia, tē mōhio mai e te hoariri tokohia katoa i te pā, me tūpato te whakaeke. Kei a Ngāti Umutahi, a Ngāti Rangitihī a Ngāti Rangihouhiri mā, mō te whiri taura harakeke; mā te whakakikī ka kaha rawa atu te taura. I rongonuihia rātou mō te heke i ngā pari, kāore tēnei tūāhuatanga i kitea i waenganui i a Ngāi Tāua, heoi, i mahi pērā a tātou tupuna. I rongonuihia i te mea, ka eke a Ngāpuhi ki runga i a Mōkaingārara i te timatanga o ngā tau 1800, ka hekea pērātia ngā pari e ngā toa, ka mutu, kei tua kē rātou o te hoariri, koia kāore a Ngāpuhi i hoki mai anō ki konei. Nā, kei te pito rā anō o Waitepurū, he whenua e kapi ana e te pātītī, kei runga rā anō, kei te taha matau. Kei tua atu, kei te taha māui, ko Whakapoukōrero. Ko te pātītī, ko te hiwi iti nei, he hiwi anō, he āhua nui ake i te mea tuatahi. He pā. Ko Karamea te ingoa. I tapa ki te ingoa o te maunga, a Karamea. Nō konei kē te ingoa, ka tapa ki te maunga, ko te pā o te patupaiarehe tērā. E ai ki te kōrero, i ngā rangi pūkohukohu ka rangona, i taua pā, ko ngā pūtorino a ngā patupaiarehe e whakatangihia ana. Whāia tonuhia te pae maunga, ko Whakapoukōrero, kei tōna pito whaka'uru ko Whakapau Karakia, he pā anō.

Mai Awatarariki ki Waitahanui, he maha ngā pā. Nō Ngāti Rangitihī, nō iwi kē. Ko tētahi, ko Te Mimihā, kei ōna take, ko te toka Whakarewa. He hoanga a Whakarewa hei whakatika i ngā toki. Kei Te Whare Pūpuri Taonga o Tāmaki Makarau ia e mau ana. I te hangahanga mai o te ara tereina, ka hikina ia ki te wākena tereina, ka tuku ki Te Whare Pūpuri Taonga o Tāmaki Makarau. Kei te takiwā o te timatanga o ngā tau 1900.

Ko te wāhi nei, ko Te Awa o te Atua, i tapa ki te ingoa o te pā, ko Te Matatā. Ko tōna ingoa tūturu, ko Te Awa o te Atua, heoi, he maha ngā wāhi o konei i whai ingoa kē. He wāhi whakahirahira tēnei. I nohoia aiotia te whenua e te maha o ngā iwi, he wāhi whai mana ia. He pūrepo katoa te rohe nei - atu ki Kawerau, whakawhiti ki Awakeri, anō ki Kohi rawa, he repo. Kotahi anake te huarahi mai i konei ki Whakatāne, mā te whakawhiti i te awa ki te ākau ki Whanaungakore, ka whakawhitia anō i Ōhinemataroa ki Whakatāne, ki Kohi, ka ekea he waka i konei, hōea atu ki Tee Orini, terea Te Orini kia tae ki Ōhinemataroa. Ka whā haora te roa o te haereere, hei tā ētahi. I konei te muriwaitanga o ngā awa, me mātua haere mā konei ahakoa e haere ana ki hea. I mau te rongo i konei, i āhei te nekeneke haere a te tangata. He maha ngā iwi, he maha ngā hapū i nohoia tēnei whenua i o rātou nā wā, i whakpūmautia ai te rongo taketake. He ara kei ngā tahataha o te repo, he ara nui anō kei Te Mimihā, ka haere ki uta, ki Maunga Whakamana rā anō, he pēnei tōna taumata i muri iho i a Kawerau. Kua tohua a Ngāti Rangitihī ki reira e te Kooti Whenua Māori. I kōrerohia tēnei e Rihi i mua. He pai tēnei hei tauira. Kua mana a Ngāti Rangitihī i Pokohū, kāore i tohua mai i Haehaenga. Hāunga ngā taunakī a ngā rangatira o Ngāti Rangitihī ki te kooti i te wā i rongohia te take, i mātua whakapapatia a Ngāti Rangitihī ki Te Haehaenga rāua ko Maunga Whakamana. I riro ki iwi kē a Haehaenga, kua ki a Ngāti Rangitihī. Ki te pānuihia te kōrero mō Ngāti Rangitihī, ka kitea ngā taunakitanga. Kua makere i taku hinengaro te ingoa o te tupuna i tuku kōrero mo Te Haehaenga i te mahau tonu o tōna whare. Ko āna kupu whakarite, ko te mahau o tana whare me te mōra o waho. Koia tōna tirohanga ki Te Haehaenga. Ka mutu, kīhai Te Kooti Whenua Māori

i whakawhiwhia he whenua ki a Ngāti Rangitihī.

Ko te wāhi nei, he wāhi whakahirahira. He maha anō ngā whenua e whai pānga mai ana ki konei, kei te kōrerohia i roto i te kōrero a Ngāti Rangitihī, ka kōrero anōhia aua wāhi. Nā, ko Otaramuturangi, ko te urupā tērā kei tua o te awa o Tarawera, kei te ākau. Koia pea te urupā tawhito rawa atu i Aotearoa nei. E ai ki te kōrero i homai ki ahau, hei ingoa anō te tara mō te wekeweke o te wheke, nā reira ko Otaramuturangi. Ko te tara o te wheke, Muturangi. Nō reira tōna ingoa. E ai ki te kōrero, i tīhaetia tētahi o ngā tara o te wheke; pūrere atu ana ia ka whāia e Kupe, ki Raurima, ki Moutohorā, kei te urupā te tara e takoto ana. Ka whāia ia e Kupe ki te Tai Rāwhiti ka mau ia i Te Moana o Raukawa, ki reira a ia i patua kia hemo. Ka wehi tonu rātou ki te mana o te wheke, me te whakapono ahakoa i te mate ia, e āhei tonu ana ia ki te whakatakahuri i ngā waka. Ka tīkaroa ngā whatu o te wheke ka haria ki tētahi o ngā motu e tū ana ki Te Moana o Raukawa. Nō Ngai Tahu, Ngāti Mamoe taku māmā. I a rātou e whakawhiti ana i te moana, ka tata atu ki ngā motu, ka huri kē o rātou kanohi kei whakatakahurihia tō rātou waka e te wheke. I konei taua wheke. He maha ngā waka i ū ki konei, ko te nuinga nō Te Arawa, nō Mataatua, heoi, he waka anō i ū mai ki konei, ki te pānui koe i ngā kōrero o iwi kē, i ngā pūrākau o iwi kē, ka mana te kī, i ū mai rātou ki konei. Ko Takitimu mā.

He kōrero anō; i tapoko a Te Arawa ki konei, ka mau ki te one i te muriwaitanga o Te Rangitaiki rāua ko Tarawera. He pūkei oneone i te takere o te wai, ka mau te waka ki korā. Nō Hawaiiki te ingoa Ōnīao, ka haere a Ngātoroirangi ki uta, ka raru te waka, tē tāea e ngā karakia a Tamatekapua te tuku i te waka, ka tono ki a Toroa, māna te waka e tuku. Koia tētahi kōrero, he maha kē atu ngā kōrero, tae noa ki te kōrero mō Tainui rāua ko Te Arawa hei waka hūhunu. He kōrero anō tērā. Ka whai tikanga tērā kōrero ki ahau i te mea, kāore pea te waka ama e poharu engari ko te hūhunu ka poharu, ka oke i roto i te kirikiri.

Rāwiri Te Kōwhai: Pātai mō Ōnīao.

Anthony: E Rihī? Nō Hawaiiki taua ingoa nē?

Rihī: Āna. He aha tō hiahia mō Onīao? Ko te nīao o ngā waka, he kōrero mō te wā i whakawātea a Mataatua i a Te Arawa i te one tahua, koia i tohua aua waka e rua ki te maihi i korā.

Anthony: Ko Hikakina rāua ko Rangihouhiri kei ngā taha, ko Tūwharetoa te tekoteko

Rāwiri Te Kōwhai: I mua, ko Toroa ki tētahi taha, ko Tamatekapua ki tētahi taha, nē?

Anthony: Ehara. Ko Te Rangihouhiri rāua ko Hikakino. Kāore ahau i te whakaae ki te whakaaro he rite tonu tā tātou pakanga ki a rātou i te mea he nui rawa ngā kōrero mō a tātou pānga. Kāore ahau i te rata ki aua kōrero. Ki ōku whakaaro, he whānau kotahi tātou, ahakoa te kōhetehete. Kia mau ki aua whakaaro.

He aha kē atu? Kāore aku kōrero kē i tēnei wā. He pātai anō ā koutou?

Kanapu Rangitauira: He maha ngā iwi i nohoia a Te Awa o te Atua, ka kitea pea ngā whakautu i roto i aua rauemi i kōrerohia e koa, kīhai tonu nei au kia kite..

Anthony: Kua pea ko ētahi iwi, he whanaunga kē, kei te mōhio koe, he karanga maha. I tēnei wā tonu, he maha o tātou karangaranga, he āhua rite ki tērā.

Kanapu Rangitauira: He wā i āta tohua ko Ngāti Rangitihī te mana whenua? Kei te kōrero rānei koe mō ngā karangarangatanga a te iwi anō, nō nā hea a Ngāti Rangitihī i kiia ko te mana whenua o tēnei kāinga?

Anthony: E kore e tāea e au te āta whakautu i tō pātai. Ko tāku noa, i konei kē a Ngāti Rangitihī i mua i te pakanga o Te Kaokaoroa. Kei te rongo au i te kōrero, kei te rongo hoki a Ngāti Rangitihī, “ehara i a koutou a Matatā kia karātingia rawatia tērā whenua ki a koutou e te karauna.” Kāore i te tika. I konei kē a Ngāti Rangitihī, hei Ngāti Rangitihī, hei Ngāti Rākeiao, hei Ngāti Apumoana. Ahakoa tō tātou ingoa karangaranga i aua wā, i konei kē i te timatatanga o ngā tau 1800, i mua atu rānei. I te wā i tae mai ai a Ngāpuhi, i konei kē a Ngāti Rangitihī.

Ko wai ka mōhio ka hia kē te roa rātou i konei? E aua. Heoi, ki ōku whakaaro mō a tātou pānga ki a Arawa, e kore te waka e ū mai ki konei me te kī “ He ataahua tēnei wāhi” kātahi ka wehe ki wāhi kē. Kāore e kore i noho mai tētahi. He tāngata anō pea i runga i te waka, engari kīhai i tohua. I haere a a Oro, a Maaka a Ngātoroirangi ki uta engari, he tāngata anō i runga i te waka, i ahatia rātou? Ko ētahi i heke i Maketū. Mō muri aua kōrero rongohia ai. E tika ana i konei ētahi i te mea i konei te tangata e noho ana. Ko ngā kōrero kua rongohia ai e au, mō te taenga mai o Ngāti Rangitihī ki konei, kua tau i ahau, e hē ana. Kua kiia kētia e au, kua kitea e au, i whakarere haki i konei. Tipene, he aha hoki te haki i whakarerea i konei?

Tipene: I whakarerea a Apumoana i tētahi wā, mō tētahi ariki, nē? Ki ōku whakaaro i haria mai mō te rangi kotahi anake, hei tā rātou, ko Apumoana tētahi i rere i konei.

Anthony: Kua kitea e au, i konei a Rākeiao e noho ana mō tētahi wā, ko te tangata tonu. Ki ahau nei, hei rerenga pea te tino koroua, i ōna wāhine (katakata). “he wāhi pai hei huna māku”.

Kanapu Rangitauira: Hei tāpiritanga tērā ki taku pātai o mua. Ko Tarawera hei kāinga tahi, ko konei hei kāinga rua – e ai ki te tau, e tika ana tērā?

Anthony: Kāore ahau i te mōhio, kāore aha i te mōhio mō te neke haere e ai ki te tau. Ki ahau nei, i noho tūturu a Ngāti Rangitihī ki konei, ko te awa hei piringa tangata. Ki te kore o tātou kāinga i ngā taha o te awa, he aha i riro mai ai a Allotment 30 hei whakahei ātanga Karauna? Ko tā te Allotment 30, he tiaki i te hiwi mai i Manawahē, ki Rotomā. Ka mutu, i whakamahia taua ara hei whiunga kararehe, ka whiu i ngā hipi mai i Te Tai Rāwhiti ki te hokohoko i Rotorua. He ara tawhito tērā i whāia, ka whakawhitia ia i a Allotment 30, i karātia katoatia aua whenua ki a Ngāti Rangitihī e te Karauna.

Rāwiri Te Kōwhai: Pēhea ngā kōrero a Don Stafford mō te noho a Rangiaohia ki ??? tata ki Sulphur Point i Rotorua?

Tipene: Sulphur Point. I te wā i a Rangiaohia, he kāinga pea tōna i reira kāmutu ka haere ki Tarawera, ki Moura me aua wāhi katoa, i nohoia aua whenua katoa e ngā pū manawa e waru. I Rotokawa a Tūhourangi, i Ōkawa, i Motutawa te urupā, Rangitihī; Ko Rangiwahakakapua tōna pā i muri atu i te karapu a Pikiāo, peka atu i te rori matua, i te taha māui, kei te taha matau ngā

toa, ko Rangiwahakakapua te pā a Rangitihī, ka neke mai a ia i Pākotore; kei te huarahi e ahu atu ana ki Maketū. Ka haere atu ana ki reira ka kitea ngā wāhi i tū ai ngā pā tawhito, kei tua atu a Pākotore. Tāria te wā ka nuku ia, ka wehe ngā tamariki. Ko Tūhourangi, i nuku ki Wairoa, ko Rangitihī ki Moura me Tarawera. Nō mua noa atu aua kōrero. I te wā e ora tonu ana rātou, kei te tata tonu ki te wā o te hekenga mai o te waka.

Rāwiri Te Kōwhai: Ko tētahi kōrero kua homai e Matua Pere, i noho a Uenukumairarotonga i Mokoia. Ka tonoa e ia a Rangitihī kia haere i te mea, i te whakarite ki te pakanga. Nā reira ia i haere ki Tapuika, ka moea ngā tuāhine kia matomato te tupu a ngā uri ki Te Rotorua Nui a Kahumatamoemoe.

Tipene: Ngā tuāhine, hmmm, kei te pukapuka a Don Stafford, ae, he rite ki a Tūhoe, ko tā Tāmami Kruger mai ki a mātou, i pērā anō a Don Stafford ki a Elsdon Best mō te pukapuka Tūhoe, i haere ki ētahi kaumātua, kuia mō ngā kōrero nō reira me tūpato tātou, he kōrero i tuku iho ki te pākeha, nā te pākeha i tuku anō hei pukapuka. Ahakoa he kōrero Māori a Don Stafford, me aro hoki ki te tangata nāna te kōrero i tuku ki a ia. I te mea, he whakahīhi ētahi, ka whakarangatira rātou i ā rātou ake tupuna “ko tō mātou tupuna te tangata hirahira, nāna rātou i patu” ka haere ki iwi kē, ki hapū kē o Te Arawa, “ehara, nā Rangiwahakaekeau” ko tētahi atu rānei te tinotoa, nā reira kei te tirohanga o te tangata e tuku ana i te kōrero, kei te pērā tonu i tēnei wā, kei te rawekehia ngā kōrero mō o rātou koroua me o rātou kuia kia hira ake tō rātou mana i tō ngā rangatira o ngā hapū, kia whakanuia tō rātou whakapapa. Kei te pērā i ngā wā katoa, i te ao hurihuri nei, ko te ipurangi te waka kawē i aua pōhēhē. Pērā i a Tūhoe, kei te tuku a Don Stafford in ngā kōrero i kōrerohia e tētahi koroua, ehara i te mea e mana ana ana kōrero.

Kanapu Rangitauira: I te kōrero tahi māua ko Hannah i a māua e taraiwa mai ana ki konei, ko tētahi āhuetanga pea o te kōrero a Ngāti Rangitihī, ko te tautohetohe, nē rā? He nui ngā kōrero kē e pā ana ki ēnei kōrero, ko tētahi o ngā tino take o ēnei wānanga whakapapa, ko te whai wāhi atu te iwi ki te whakarongo ki ngā kōrero a Ngāti Rangitihī, kia kiia pea “nōu ērā kōrero, nōku ēnei mōhiohio”. I te mea, kei ngā rohenga o Ngāti Awa, o Mataatua e noho ana, kei te toiroa o Te Arawa, kua kei te toipito o Te Arawa ahakoa kei te whai pānga tonu ki a Te Arawa...”

Anthony: Ko te whakawhanaungatanga tonu. Ko te kī “I tūtaki māua ko mea”. I mea tētahi o ngā wāhine i konei i mua, ko tāna “i piri māua ko te kōtiro rā, kātahi ka rongo he pākanga kiri-tahi a ia ki ahau” “taku tūmeke, hoki”. Ka pērā i ngā wā katoa. Koia tētahi o ngā tūāhuetanga o ēnei wānanga. He taura here i te tangata. Kia mārama te iwi ki a rātou anō, kia mahi tahi ai tātou, koia tōna tino tikanga. Ki te pērā tātou, kua whai hua.

Rāwiri Te Kōwhai: Ko tētahi mahi nui, kia noho tūwhera te hinengaro, he whakapae noa iho ēnei, kia tūwhera, kia rongo ai koe ki ngā kōrero katoa. Ka tae ki te wā ka tū koe ki te kōrero, ka kī “E ai ki te kōrero a mea – kia kua koe e raru. E ai ki a Tipene, ka raru kē ko ia”

Tipene: Ehara, e Kanapu, he hoko kai ki uta, he kaimoana, kaiawa, he hokohoko te mahi, i te kōrero a ia mō Mimiha, he huarahi i haere tōtika ana ki Tarawera hei kawē mai i ngā kereru me aua momo kai, ka whakahokia atu he pāwhara. Kei ngā whakaahua katoa a ngā mihingare, a Banks mā, rātou katoa, kei te whakaatuhia ngā whata i iri ai ngā ika. Mā te pāwhara e tau-

roa ai te ora o te ika, hei kai i te wā o te korekore. Ka rāhuitia te wai tai hoki, karekau tātou i haere poka noa ki ki ruku kina, ki te ruku kuku rānei, tae noa ki te kari pipi. Ka whakamaroke i a rātou ka whakairingia hei hoko atu ki tō tātou iwi, ō tātou hapū i Tāpahoro, i Moura, he iwi i whai kai i te ngahere, he kohi kaimoana me te kōura, kāore e kore, he kōura i konei i aua rā, i ngā awa o konei, heoi, ko te kereru me manu kē...

Anthony: Hei tauira, i haere māua ko Kenneth ki tua o te whakawhitinga o te ara-tereina i te rori ka kōrero atu au ki te hunga i reira mō taku whānau, he haututū taku pāpā ko ōna tuakana. Ko ia te mea tamariki rawa, i te pēpi tonu a Uncle Chris. Ka herea ia ki te taura, ka whakahekengia ia i te pari ki ngā rua tītī, hei hopu i ngā tītī. Hei aha noa te whakaaro ki a ia, inā ia i makere atu, ko te mate tonu atu te utu! I kōrerohia mai aua kōrero e taku pāpā i taku ui atu i a ia mō te take i te matakau a ia ki ngā wāhi teitei. Ka pērāhia koe e ōu tuakana, ka whakatāiri koe i te pari e pēnei ana te teitei, ko te taura noa e mau ana i a koe! I ahau e whakaatu ana aua kōrero ki a Kenneth, ka mea mai ia “ehara tērā mahi i te mahi a te whānau a tō pāpā anake, i pērā hoki mātou i a mātou e tamariki ana!”

Nā aua kōrero, nō te wā i a mātou tonu, i kitea te tītī i konei. I te mātotoru tonu te manu i konei, tae rawa ake ki ngā tau waenga o ngā tau 1900. Nō ngā tau whakamutunga o te pakanga, kei te takiwā o te 1940/45 i āhua, i whānau mai a Pāpā kei te wā o te 30? 35? I te 1940 pea i te whakairingia a ia i te pari, nō muri mai, kāore he paku aha i konei. Kei te kitea te take i tautohengia ai te whenua nei. E mārāma ana te kite, he repo nui, ngā hua o te wai tī me te wai tā, he tuna, he kōura. Me he taniwha ngā tuna, nō reira ngā kōrero mo ngā taniwha me aua momo kōrero. Ki te whakaaro tuna koe, kāore ōna hoariri, he nui te kai, ka kai, ka kai, ka kai, ka kai kia nui. Tūturu, i pērā. Anō hoki, ko tētahi kōrero rongonui a Joseph Banks i tana haerenga atu ki Ōtautahi, ki ētahi atu wāhi i Aotearoa i runga i te Endeavour ki te taha i a Cook, i kī a ia, he hoihoi rawa ngā reo o ngā manu i te ata. Hei tauira ake i te nui o te manu i taua wā, tē rongo i ōu ake whakaaro. I kī a ia me kuhu ki tōna ruma i runga i te kaupuke kia kaua te māhunga e ānini i te korihi a ngā manu i te ata. Ko te repo tēnei e kī ana i te manu. He humi te kai. He hiahia nō ngā iwi ki te noho mai ki konei. Ka tātari mai te wai ki ngā puna wai – ka wani kē.

Rāwiri Te Kōwhai: Nō hea te ingoa Te Awa o te Atua?

Anthony: He maha ngā kōrero rerekē. He kōrero kē mō Wairaka kē, mō Muriwai kē e pā ana ki te mate wāhine i roto i te awa, ki te kōrero mō Te Atua Reretahi, ko te awa i rere mai i te ana kōiwi i Maunga Whakamana. Kei te mōhio tātou, kei reira a Tionga e tanu ana. Ka kī mai ki a Ngāti Rangitihī ehara i a rātou taua maunga?

Tipene: ko te kōrero matua o Te Arawa he kōrero nā Ngātoroirangi kē, i tōna tapokotanga mai i runga i a Te Arawa ka kitea ka nui te ranea o te kai, he maha ngā kai tā, kai tī, te kai a Rangī, ka kī ia, “he atua kei konei a, ko Te Awa o te Atua”. He Atua i konei. Mō te mate wāhine a Wairaka rānei a Muriwai rānei, i roto i te wai, hei whakanoa i te kai me hiki a Toroa, tana pāpā, i te tapu, ka tapa ki Te Awa o te Atua hei hiki i te tapu, ki te kore, e kore te tangata e wātea ki te kai i ngā hua o konei i te mea i runga i te tikanga Māori, kia kaua te wahine e haere ki te kaukau i te awa, i te moana i a ia e mate wahine ana. Ko ngā kōrero mō Te Awa o te Atua, he rongorua. Ko ā Mataatua kōrero me ā Te Arawa kōrero, he rerekē. Ko taku tauparapara i te ata nei, “i ūnga mai te waka, i ūnga mai Te Arawa i Te Awa o te Atua”... ka wehe mai tātou i

Tāhiti, i Rangiātea, te timatanga o te hekenga mai, kei reira te ahurewa tapu, kei Rangiātea, Tāhiti, Ariari ki Rarotona, ki Rarotonga, ki Whangaparāoa; ko Whangaparāoa tērā, kua ko te Whangaparāoa i Tāmaki, te wāhi i ū atu ai te maha o ngā waka. I taua wā, he āwha pea, e whā, e rima pea rātou e piri tahi ana, ka pūhia rātou ki korā pea. E ai ki te pākeha, i pūhia noatia mai tātou ki konei. E whitu, e waru, tekau rānei ngā waka i tae mai ki te motu kotahi i roto i Te Moana Nui a Kiwa,, kāore au e aro ki te take i tere pokerehū mai, he mātanga tātou. Kei te whakatairanga rātou i te whakaterere waka moana, me te tātai whetū Ae, i ū mai tātou ki konei i muri mai i te heke ki Whangaparāoa, ki Rangitoto, ki te whanga o Te Waitematā, ka huri i a Moehau, ki te takotoranga o Tamatekapua, i te Hauraki, ki runga i a Moehau, kātahi ka ū mai ki Te Awa o Te Atua ka mutu ki Maketū ki Te Kūrae o te Ihu a Tamatekapua, ki te Kaituna. He tino wāhi tēnei ki a Mataatua, i ū mai rātou ki konei, a Tainui hoki. He kōrero mō Tainui. I haere tahi mai a Mataatua rāua ko Te Arawa, i te mea, kei konei tātou, ka kī, ko Te Arawa i ū tuatahi mai. Aroha atu, e Rihī. Ai, kua moe kē ia. I ū mai a Te Arawa rāua ko Mataatua ki konei, ko wai ka mōhio ko wai i tae i mua i a wai? Ko Mihimarino te pūaha. E mau tonu ana ki aua ingoa tawhito. Ko Te Kōpu-a-Kuku, te wāhi i ūtaina mai ngā waka e rua, kei te taha o te rori matua, kāore kē he rori i aua rā, te wā i te tere mai ngā waka me ngā awa. Kīkī ana te wāhi nei i te wai, ka whakaterere ngā waka i te Kōpu-a-Kupu, kei raro iho nei, kei reira tonu, ka tōia ngā waka ki uta kia kua rātou e kawea atu e te tai. Ka ūtaina ki reira, Te Kōpū-a-Kuku, te kupenga o ngā waka, te taunga herenga waka, hei taunga mō rātou.

Ko Te Wai Ū o Pare Mōkai, he puna. Ko Ōtaramuturangi hoki, kei tua atu. Kāore hoki he pūaha o taua wāhi i tōna wā, he oneone katoa. Ka puta tahi atu ngā awa i konei, ko rātou ētahi o ngā ingoa. He ingoa anō kei raro rā, ki ahau nei, kei pōhēhē ētahi ehara i te whakapapa, engari tonu, me hikoi tātou ki aua wāhi kia kitea a kanohi atu. Ki te pā ōu waewae ki te whenua ka maumahara koe ki ngā kōrero mō aua whenua, kua takahi kē au i te ara mai i Te Waimana ki Maunga Pōhatu, e toru rā te roa, kei te mau tonu au ki aua kōrero o Ngāi Tūhoe me te tini o ngā pā i te mea i takahia aua whenua e mātou, he kitenga a te karu hoki ka kī ‘ko mea tēnei, te mea, te mea, te mea’, nō te tau 2004, 13 tau ki muri, e kore e warewaretia inā ia koe e tū ana ki runga i te whenua, e mana ana tō tū o tō mōhio ki ngā wāhi whakahirahira katoa. Tāpahoro, kei raro nei, taihoa kia āta haere ake ki reira. Ka haere atu ki te pou?

I takaia ki te akatea, ko te akatea tērā kua takaia ki tōna upoko. Kei te kitea te akatea? I te pakanga ia, i patua tana ūpoko kia pakaru, ka takaia ia ki te akatea, ka arahina tō tātou iwi kia eke panuku.

“Tokowhā ngā wāhine.... he reo Māori katoa ēnei kōrero.... Tūhourangi.

Ka whakawhitia a Rangiaohia rāua ko Rātorua, hei tāna, koia hoki te whakapapa i taki i te whakatūnga mai o te pou nei, ka mea “ ko wai ki runga?” Ka wānanga ngā koroua, i pērā i aua rā, koroua mai, kuia mai, ka tohua ko Rangiaohia ki runga. Ahakoa 100 tau ki muri, nō te tau 1927 te whakatūwheratanga mai o tēnei, kāore e kore i te wānanga rātou e rua tau pea i mua mai, kei te 1925-1926 pea, 100 rau tau ki muri tērā, he take nui tonu te taki i te whakapapa ki a Rangitihī rāua ko Rangiaohia, i tukua ihotia mā te waiata, mā te whakapapa, he hui nui i tū ki te whakawhitia whakaaro mō te tupuna ka tū ki runga, ka tau ko Rangiaohia. Akene pea ko aua kōrero i kōrero kētia e au, i te mea ko Ngāti Rangitihī tātou, kei te whakamana i a Rangiaohia, ko ia kei runga. Ki te haere ake ki Te Pākira, ko Tūhourangi kei runga, he kupu whakamanamana noa pea, nā tātou, e aua? Kāore taku kuia i rūkahu, i kī kē a ia, nā ōna

koroua a ia i aka, ko te mana tātai tērā, ko te mana a te tuakana, teina tērā atu, ko Rātorua kei runga. E ai ki te kōrero, kāore a Rātorua i te rangatira rongonui nō reira kāore e tika ana tana tū, kāore rātou i te mōhio i haere atu a ia ki hea, mēnā ia i haere a ia ki roto i a Ngāti Whakaue, ki hea rānei, nō reira ko Ngāti Pikiao te ure tārewa, kei Tāheke, ko mea, kei te tirohanga o te tangata kei te kōrero āna kōrero.

Kanapu Rangitauira: Tipene, kia tika mai, ko te raupapa i ngā ūpoko, ko Rangiaohi ki runga, ko Tauruao, (ae, ae, ko Tauruao te wāhine, ae, kātahi ko...

Tipene: Rangiwahakaekau, Ratorua, Rakeiao, Kawatapuaringi, Apumoana, ka mutu ko Tūhourangi. Nō te tau ... i whākī mai taku kuia ki aha, i te noho au ki tōna taha, i te ora tona ōna whakaaro. I tae mai te momo pērā i a Hiko Hōhepa i a Kāwana Nepia ki te whakawhitia kōrero ki a ia. Kāore a ia e kōrero.... he pono ki tōna katorikatanga, mēnā ia he painga tērā... he kuia, he koroua i haramai ki te kōrero ki a ia, ko tā māua he manaaki, kāore a ia mō te....

Rāwiri Te Kōwhai?: Ko te tupuna rā, a Ratorua, ko Te Ratorua Kunitimiti Te Hinu Houmai-tawhiti te roanga atu o tona ingoa.

Tipene: Nē rā? Nō Ngāti Whakaue?

Rāwiri Te Kōwhai: E kao.

Tipene: I mutu a ia ki hea?

Rāwiri Te Kōwhai: Ka mutu, kei te takoto ia i te urupā i Owata, he pā, kei reira te urupā. Ka mutu rātou ki korā i muri mai i te whawhai whenua i Whakarewarewa; ko Ratorua, ko Ngāti Whakaue rātou ko Tūhourangi.

Tipene: Ae, ae, ka pai. Nā taku kuia aua kōrero, ki ahau nei ko ia te, i haere mai rātou i Rotorua; a Irirangi, ngā mōrehu, nē.

Ko Te Raimona e takoto mai nei. Tētahi o te whānau Rāponi. Ko te ingoa o te whenua ko Aue Te Rerehika, e ai ki a Aunty Pat Rondon.

Monika: Kei te mahara ahau ki ngā pakeke e whakahua ana i a Rangiaowhia.

Tipene: Āna, kei roto i te whareniui, ae. Kei te kōrero kē tātou mō te whenua i waho nei, Monika. Ko te whenua. Aue Te Rerehika. Nā Aunty Pat taua ingoa i whakaatu mai mo tēnei whenua, titiro, i whakatū a Ngāti Tionga he whare i raro rā, ko Nukuteapiapi te ingoa o te whareniui. Ka āia atu te tuanui o te whare e te paraawa ki konei, he tohu ki te iwi – ka nui te marae kotahi mō Ngāti Rangitahi, tē whai hua o te noho wehewehe, ka nuku mai ki konei, ka tōpū te noho a Ngāti Mahi rāua ko Ngāti Tionga. Ko te wā i a Arama Karaka tērā. He noho tōpū rātou ko Ngāti Mahi, koia tātou i whakarauika mai ki tēnei marae. Ko Aue Te Rere Hika, i te mea nā Aunty Pat i whakaatu mai ki ahau, e whakapae ana ahau he ingoa nō roto o Ngāti Mahi mō te marae i konei i te honotanga mai o ngā iwi, nō te pahūtanga, nō muri tata mai o te pahūtanga, tēnei whareniui i hanga mai ai. I taua wā, he raupō, he pakitara kaponga, he raupō, he whare ahuru e au ai te moe, engari me whakahou ia 30 tau, ia 20 tau pea, ka timata rātou ki te whakamahia i ngā hangarau a te pākeha hei hanga whare, ehara i te takahanga i to

mana, e Rangiaohia, he raima hei papa, he rākau, he whare tūroa. Ko ngā tikanga o te hanga, he tūtūrū, ko te tāhūhū, ko ngā heke, e āhua aupiki ana. I te mea he whenua rū a Aotearoa, ko ngā whare tupuna ngā whare i tū tonu, he mārohi. Ka tū tonu ai ngā wharenuī. I mine mai ai rātou i te rūtanga o Patutātahi i te tau '87. Rātou katoa i mine mai ki konei, kāore ō rātou wai, kāore ō rātou ara tukupara, i haere mai rātou ki konei. Kei te whakamahia tonu tātou i ngā marae hei whakamarumarū i te tangata. He wharekai, he wharepaku, he wharemoē, he aha kē atu kei te hiahiaia i te wā o te ohotata? Ae, koia anake. Ka ngana mātou ki te kōrero pēra ki te Rākau Whakamarumarū me te Kaunihera a Rohe, heoi anō, kei te āhua aro mai rātou engari, kāore anō te iwi Māori kia whai māngai ki te kaupapa whakamarumarū. Ka rangirua rātou i Rotorua. Ka kī, “Rangitihī! Ka kite mai i ahau, i tētahi o ngā kanohi a Ngāti Rangitihī, ko Ngāti Rangitihī tātou, nē. Kua tapa tātou ki te ingoa o te tupuna engari ehara tātou i te tupuna. Me kī kē koe, ko Ngāti Rangitihī, ahakoa ka kī tonu atu ētahi,” ko Rangitihī” engari ko Ngāti Rangitihī tātou. Ko Rangitihī te pāpa o ngā pūmanawa e waru.

Kanapu Rangitauira: Kei te kōrero koe mō te iwi, nē? Kua mō te marae? I kī koe ko Ngāti Rangitihī te marae?

Tipene: E kao, i kōrero pēra au i mua. Aue Te Rerehika te marae. Te whenua, ko te marae te whenua. Ae, ko ngā hapū rānei, ko te iwi rānei, he hapū i tōna wā, kua iwi ināianeī. Mōhio koe, ko ngā pūmanawa e waru, ko ngā iwi a Tūhourangi, karekau tātou i te hapū, kua whai kē tātou i ngā tikanga pākeha. Ki te haere koe ki Pōneke, me whai iwi koe kia aro mai rātou. Ki te haere atu ki reira me te kī ko Ngāti Rangitihī te hapū, ka mea mai rātou “ taihoa, e 50 ngā iwi puta noa i Aotearoa, engari 3000 ngā hapū, me kua mātou e aro ki te manomano hapū”. Koia te take, ko Te Pūmautanga tonu tētahi, i haere ake ki te Ūpoko, ko wai tā rātou ingoa o mua? I te hokinga atu i kī “Ko Te Pūmautanga o Te Arawa” ae, i panonihia tō rātou ingoa. I Pōneke, ka kī rātou, “Ngā Kaihautū, ko wai rātou?” Ka hoki mai ki te panoni i to rātou ingoa.

57.54 Reo Māori. Mihi, karakia.